

者以稅給之、七年十月乙卯朔、美濃武藏下野、伯耆、播磨、伊豫六國、大風發屋、仍免當年租調、

〔續日本紀聖十武〕神龜四年十月庚午、安房國言、大風拔木發屋、損破秋稼略、中加賑恤、

〔續日本紀聖十五武〕天平十五年八月乙亥、上總國言、去七月大風雨數箇日、雜木長三四丈已下、二三尺已

上一万五千許株、漂著部內海濱也、

〔續日本紀聖十六武〕天平十八年十月癸丑、日向國風雨共發、養蠶損傷、仍免調庸、

〔續日本紀孝十九〕天平勝寶五年九月壬寅、攝津國御津村、南風大吹、潮水暴溢、壞損廬舍一百十餘區、漂

沒百姓五百六十餘人、並加賑恤、仍追海濱居民、遷置於京中空地、十二月丁丑、免攝津國遭潮諸郡

今年田租、六年十二月乙卯、是年八月、風水畿內及諸國一十百姓產業損傷、並加賑恤、

〔續日本紀淳仁二十〕天平寶字三年九月丙子、太宰府言、去八月廿九日南風大吹、壞官舍及百姓廬舍、

十一月甲子、詔曰、如聞去十月中、大風百姓廬舍、並被破壞、是以爲修其舍、免今年田租、丙寅、詔賜大

保已下、至于百官官人、繩綿、各有差、以被風害、屋舍毀壞也、

〔續日本紀稱德二十七〕天平神護二年六月丁亥、日向、大隅、薩摩三國大風、桑麻損盡、詔勿收柵戶調庸、

〔續日本紀稱德三十〕寶龜元年正月甲申、大宰管內大風、壞官舍并百姓廬舍一千卅餘口、賑給被損百姓、

〔續日本紀光仁三十二〕寶龜三年八月丙寅、是月自朔日雨、加以大風、河內國茨田堤六處、澁川堤十一處、志

紀郡五處並決、十一月丁亥、去八月大風、產業損壞、率土百姓被害者衆、詔免京畿七道田租、

〔續日本紀光仁三十三〕寶龜六年八月癸未、伊勢、尾張、美濃三國言、異常風雨、漂沒百姓三百餘人、馬牛千餘

及壞國分并諸寺塔十九、其官私廬舍不可勝數、遣使修理伊勢齋宮、又分頭案檢諸國被害百姓、辛

卯、大祓、以伊勢、美濃等國風雨之災也、

〔續日本紀光仁三十五〕寶龜九年三月己酉、土佐國言、去年七月、風雨大切、四郡百姓產業損傷、加以人畜流

亡、廬舍破壞、詔加賑給焉、